


FASNACHT 2019



«In dr Mäss steggt dr Wurm dinne!»

Unseri Mäss Basel, no nit solang isch es häär, so scheen, stolz und gross. Jetz steggt si in dr Gryse, wens es wyter goot isch bald nimmi vyyl loos. Ai Dradizioons-Mäss no dr Andere duet verschwinde, s isch uns e Gruus. D Hallene kasch bald, wie an dr Herbschtmäss, bruuchen als Gaischterhuus. Do mues doch eppis dringend basiere, neii Mässe mien jetz aane. Loos! Sunsch isch es ufaimool zspoot und dr Verluscht wird vyyl zu gross. Mer finde drum alli dr Wurm steggt naimeuure in däre Mäss dinn. Wenn nit glyy eppis bassiert, gits das Unternämme scho bald nimm.

Fange mer doch emol byy dr Mueter vo allne Mässe aa, unseri MUBA. Kuum zem glaube, aber si het dr letsch Joorgang in däm Joor kaa. Scho klar es sin schweeri Zyte, me kauft hit nyt mee vor Ort am Stand. S Internet isch do e z groosi Konkurränz, s isch doch aifach allerhand. Au Muschter an d Lyt verdaile duet sich fir d Uussteller nimmi rendiere. Scheen sin unseri Erinnerung an die vyyle Sache, wo me het kenne brobiere. Und die ganze Umständ vo dr MUBA, wirtsch es kabiere, kasch au grad uf d'Herbschtwareemäss kobiere!

He joo, au mit dere Tradizioon macht d Mäss Basel jetze Schluss. Au die isch unserem gfrässige Wurm zem Opfer gfalle mit Gnuss. So isch es halt, s isch die haarti Worhait und kuum zem glaube. Aber an der Herbschtmäss kasch kaini Waare me, nur no Staub, abstaube. Dä Wurm frisst sich vo allne Syte zmittsduur unseri Mäss mit biss. Die gheit jetz denn bald in sich zämme, mien sage, mer hänn do schiss. Ooni Rüggsicht uf Verluscht, vo niemerem und nyt macht är halt. S isch nit zem gspasse, aber dä Wurm isch e druurigi Gschalt.

Denn gits no d Uure- und Schmuggmäss, sy steggt nämmlig au in dr Gryse. Immer weniger Uusteller kemme nach Basel, so lutet die neyi Deviise. Groosi Halle hänn si by dr Mäss von e baar Joor baut, digg ufgfaare. D Daalfaat und alli Azaaiche vom Abstieg denn doch ignoriert, die Naare. Ai Uussteller nach em Andere sait ab, renomierti Nämme gänn iire dr Schue. S goot au doo nimmi lang, so sin au d Diire vo dr Brachtmäss fyr immer zue. Mer saage drum dr Wurm steggt irgendwie dinne in dere Mäss als Ganze. Hoffentlig goots nit soo wyter, s haut das ganze Unternämme no uf e Ranze!

Mer nämme das Thema äärnscht, wänn Hilf biete by dere Gryse ooni d stutze. Die leere Mässehalle kasch sicher au fir anderi Sache seer guet nutze. Zem Byspiil dr FCB isch im Momänt nit grad top, d Fäns laufe dervoo. Wird bald nimmi im Joggeli spiile, kennt au in dr Rundhooffhallen ummestoo. Oder all die Lyt uss dr Bollidig vo dr ganze Wält de laufsch dervoo. Kennte sich doch in de leere Mässehalle reglmässig d Kepf yschloo. No luege mer emol was d Zuekunft mit sich bringt bi der ganze Gschicht. Hoffe dr Ranze vo däm Wurm isch bald satt und macht sys Muul ändlig dicht.

E scheeni Fasnacht winsche Euch

Escargots-Fratze 1993
Dini Clique.

Wotsch Gönner vo de Escargots-Fratze 1993 wärde?


Denn gang doch grad schnäll uff unseri websitte und mäld a, damit Du in Zuekunft nüt meh verpassisch. Mir freue uns uff Di.
www.escargots-fratze.ch

s'goldige Röppli



Hilf dr bescht Wage vo dr Fasnacht zfinde und schigg e SMS (Fr. 0.40/SMS) vom Morge- bis Ändstraich mit em **Inhalt: Waage (Nr.)** an d Nummere 9234 und gwinn e Goldvreneli

Mr hän d Nummere 088!! ☺ und freue uns uff dini Stimme. Viele Dangg



P.S.

D Ladäärne-Uusstellig uff em Minschterplatz und d Waage- und Reggwisyte-Uusstellig bi dr Kasäärne sin vom Määntig znacht bis am Mittwuch demoorge! Deert und an de 3 Verkaufsständ (CINS) in dr Stadt ka men au alli Zeedel und Schnitzelbängg, d Blaggedde und dr Rädabängg kaufe.

Am Fritig und Samschtig, 15. und 16. Meerz 2019 isch Noochwuggswärbig vo dr 1. Lektion im Zält uff em Barfi.

D'Zeedelläsete isch am Sunntig noo dr Fasnacht 2019, am 17. Meerz, vom Fimfi bis am Siibeni zoobe, in dr Baseldytschi Bihni (im Lohnhof 4). Dr Ytritt isch vergäbe. D Foyer-Bar isch vom Vieri ewägg offe.

Dä Zeedel isch druggt woorde vo dr Amerbach'sche Druckerei in Muttenz.